



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

## 2. Kalenderwoche – ab 11. Januar 2009

# Brognose is schwär!

Nu hammor widdor e neues Jahr. Schade, das alde is ja noch gahr nisch rischdisch offgebrauchd gewähns. Da hädde mor noch Einisches damid anfang kenn. Mor had ja ehm ooch grade erschd rausgegrischd, was das fiehr e Jahr war, das alde. Guhd, es is kee berfegdes Jahr gewähns - alleene das mid dähr Finanzgriese un de Bennziehnbreise... un de Domadn sinn ooch nisch rischdisch rod gewordn bei uns im Gardn! Abor am Ende sinn ehm de Bennziehnbreise so scheen widdor runnorgekomm, dass das sogahr de Finanzgriese abgemildord had. Un dor Koofwille von de Leide im Weihnachdsgeschäfd is ja ooch sähr befriedischend gewähns.

Was nu das neue Jahr bedreffn dud... da weeßde erschdema gahr nisch, wasses bring dud. Dud womeeschlich de Wirtschafd doch in de Knie gehn? Dun noch e baar Bankn ins Schwankn komm un dann umgibbn? Bauz - widdor e baar Milljardn zum Fensdor naus!

Ooch was das Bersehnliche bedreffn dud... - wirsde dein Job behaldn? Dusde disch mid deinor Gudstn scheen vordrachn? Machn de Kinnor keen Bleedsinn?

Das eenzsche was mor bei dähm neun Jahr mid Sischorheid sachn kann, das is, dasses widdor 365 Daache hamm dud. Un jedn Daach kann was bassiern. Bloß das de im Loddos ma dähm Scheggbodd gnagn dusd, das wird mid Sischorheid nisch bassiern.

Nee, so e neues Jahr das dud viele Unsicherheiden in sisch bärgn! Isch wär lieber bei dähm aldn gebliehm. Da habsch gewussd, wassch hab!

Isch du ja ooch bei meinor Gudstn bleim. Weil isch bei meinor Gudstn ehm ooch weeß, wassch hab.

Zwee Zendnor sinn zwee Zendnor! Wennsch mir eene neue suchn däde... nee, da weesse nie, wie das ausgehn dud. Mor kann ehm eenfach nisch in de Zugunfd neinguggn!

Ooch die Wirdschafdseggsberdn nisch. Also, isch meene die, die immor solsche Brognosn machn - so ibor das Wirdschafdschwaggsduhm un wie de Infladsjohn schdeischn dud odor nisch... die kenn das eischendlich ooch nisch wissn!

Guhd, die hamm da villeischd e baar Erfahrungen... un die dun mid dor Schdadisdigg so vogleischn un hochräschnen... abor rischdisch dun die mid ihre Brognosn ooch bloß seldn lieschn. Un soviel wies solsche Vorrassachor gähm dud, soviel vorschiedne Brognosn hasde dann ooch. Nee, wensde werglich schon immor im vornerein wissn kennedesd, was bassiern dud... da kennedesde villeischd manschn Bleedsinn vermeidn. Ooch brivad!

Da dädesde ehm villeischd doch kee außereheliches Vorhändnis anfang... odor dei Audo gleisch vorschroddn lassn... odor ehm was annersch machn odor nisch machn. Nee, wensde werglich wissn dädesd, was wie komm dud... da häddsde villeischd iborhaubd keene Lusd mähr off e neues Jahr. Abor weil mors nisch weesse, da kammor ehm hoffn, dass das neue Jahr e gudes wern dud. Das wünsch isch mir! Un ooch meinor Gusdtn! Un ooch Ihnen - e gudes neues Jahr!

**Eduard Sachsenmeyer**